

Tre Parulle...

Trè parulle d'amicizia
Chì ghjùnghjenu à scaldatti lu core,
Cume una bella nutizia,
Cume un veranu ch'ùn vole more ;
Trè parulle chì sò tanti
Colpi à e porte di l'indefferenza,
Cume trè muri tamanti
A l'edifiziu di a fratellenza.

Trè parulle di mele
Per appace lu to pientu malatu,
Quande tù brammi à quelle
Chì per d'altri sospiri t'hanu lasciatu.
Trè parulle di lume
Chì vèstenu le to notte sole,
Cume u mantellu di sciume
A l'onda chì corre sott' u sole.

Ripigliu:
Cunfidenza, rispettu, tulerenza,
Per un avvene più pruntu à riceve la nostra
[cridenza ;
Ghjelusìa, calunnìa, rise torte
Ribòmbenu in lu core di l'omu ind' un mughju
[troppu forte
D'una sintenza di morte.

Trè parulle di succorsu
Per una pace oramai difesa,
A tè chì senza rimorsu
Hai ricusatu la mio manu tesa.
Trè parulle di vita
Quande elle sò in innu cantate,
Trè parulle ferita
Quande elle n'ùn sò più pronunciate...